

Imbangan akaun semasa negara catat lebih RM9.1 bilion

Imbangan Akaun Semasa (CAB) Malaysia mencatat lebih sebanyak RM9.1 bilion atau 2.1 peratus kepada Keluaran Dalam Negara Kasar (KDNGK) pada suku kedua 2023, berbanding RM4.3 bilion pada suku sebelumnya.

Sementara itu, Akaun Kewangan mencatatkan aliran keluar bersih RM11.6 bilion berbanding RM2.4 bilion pada suku sebelumnya.

Pada separuh pertama 2023, CAB mencapai lebih RM13.4 bilion, manakala Akaun Kewangan mencatatkan aliran keluar RM13.9 bilion.

Jabatan Perangkaan Malaysia (DOSM) semalam melaporkan dalam Statistik Imbangan Pembayaran dan Kedudukan Pelaburan Antarabangsa bagi Suku Kedua 2023 yang merekodkan transaksi merentasi sempadan Malaysia dengan seluruh dunia.

Lebih yang berterusan dalam CAB, terutama disokong oleh eksport bersih barangan.

Akaun barangan mencatatkan eksport bersih RM29.5 bilion pada suku berkenaan, penurunan 26.1 peratus suku ke suku.

Perbandingan suku ke suku menunjukkan eksport barangan

menurun 2.5 peratus daripada RM261.5 bilion kepada RM254.9 bilion pada suku kedua.

Eksport utama ialah elektrik & elektronik (E&E), produk petroleum dan kimia, terutamanya ke Singapura, China dan Amerika Syarikat (AS).

Sebaliknya, import barangan

meningkat sebanyak 1.7 peratus suku ke suku daripada RM221.6 bilion kepada RM225.4 bilion, terutama disumbangkan oleh barangan modal dan penggunaan.

China, Singapura dan Taiwan adalah sumber utama import Malaysia.

Ketua Perangkawan Malaysia, Datuk Seri Dr Mohd Uzir Mahidin, berkata Akaun Pendapatan menyumbang kepada lebihan CAB yang tinggi pada suku kedua 2023.

Katanya, Akaun Pendapatan primer menunjukkan defisit yang lebih kecil iaitu RM6.3 bilion berbanding RM16.9 bilion pada suku sebelumnya.

"Pengurangan ini disebabkan terimaan lebih tinggi berjumlah RM24.8 bilion, terutama didorong oleh pendapatan pelaburan lebih tinggi yang dijana syarikat Malaysia di luar nega-

ra dalam pelaburan langsung.

"Dalam tempoh sama, bayaran menurun kepada RM31.1 bilion, terutama dalam pelaburan langsung. Pada masa sama, defisit akaun pendapatan sekunder menguncup daripada RM5.9 bilion pada suku sebelum kepada RM2.8 bilion, disebabkan penghantaran wang pekerja yang lebih rendah ke luar negara," katanya.

Sementara itu, aliran keluar bersih dalam pelaburan langsung luar negeri (DIA) pada suku kedua 2023 berkembang kepada RM8 bilion berbanding RM1.1 bilion pada suku sebelumnya.

Sektor utama yang menyumbang kepada DIA ialah perkhidmatan khususnya dalam subsektor kewangan dan maklumat & telekomunikasi, diikuti oleh pertanian dan pembinaan.

Pengurangan ini disebabkan terimaan lebih tinggi berjumlah RM24.8 bilion, terutama didorong oleh pendapatan pelaburan lebih tinggi yang dijana syarikat Malaysia di luar negara dalam pelaburan langsung



Mohd Uzir Mahidin,
Ketua Perangkawan Malaysia